



partii naleraq

Nuuk, 18. april 2015

Anthon Frederiksen

UPA2015/20

Utoqqalinersiaqartut qanigisaannik toqusoqartillugu Kalaallit Nunaanni ilisiartornissamut ukiumut ataasiarlutik pisortanit akiliunneqartalernissaat isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Nikolaj Jeremiassen, Siumut)

Siullermeerneqarnera

Inatsisartunut ilaasortap Nikolaj Jeremiassen Siumut siunnersuutaa Partii Naleqqamiit imannak oqaaseqarfigissuarput.

Partii Naleqqamiit aallaqqaasiullugu erseqqissassuarput Partii Naleqqamiit utoqqartatsinnut ataqqinnittumik pissuseqarnissaq assorujussuaq pingaartikkatsigu, tassami taakkuupput inuiaqatigiinni ukiorpassuarni sutigut tamatigut suleqataalluarsimasut qujassuteqarfigisariaqakkavullu.

Taamaattumik Partii Naleqqamiit utoqqarnut atugassarititaasut sapinngisamik pitsaasuunissaat anguniarlugu suleqataanissarput tamatigut piareersimaffigaarput.

Siunnersuummi utoqqaat qanigisaminnik illoqarfimmi allami toqusoqartillugu akiliunneqarlutik angalasinnaaneranunt atatillugu utoqqaat 65-it sinnerlugit ukioqalersimasut tamarmik assigiimmik periarfissinneqarnissaat Partii Naleqqamiit oqaloqataaffiginissaa soqutigaarput aamma pissutsit siunnersuummut attuumassuteqartut allat eqqarsaatigalugit.

Tassami Partii Naleqqamiit assut soqutigaarput oqallisissiat inuiaqatigiinni atugarliortunut utoqqarnullu tunngasut arlaatigut sukkulluunniit oqilisaaffigineqarsinnaaneri. Tassanilu Partii Naleqqamiit oqallisissiap/-alluunniit qulequtaa/tai-luunniit pingaarnertunnagit, kisiannili aaqqiiniernermi paaseqatigiilluni isummatigut naapeqatigiissinnaaneq Partii Naleqqamiit pingaartippaarput.

Siunnersuummi eqqaaneqanngikkaluartoq soorlu qanigisamik danmarkimi nunatsinnilumi toqusoqartillugu toqusup timaata nassiunneqarneranut atatillugu akiliunneqarsinnaanermut tunngasut aamma eqqartussallugit Partii Naleqqamiit assut pisariaqartoq isumaqarpugut.

Tassami tusartaannarparput, pingaartumik napparsimasoq assersuutigalugu Rigshospital-imi toqusimappat taava soormi peqqinnissaqarfiup utimut akiliussinnaassanngikkaa?

Partii Naleqqamiit isumaqarpugut ullumikkut Naalakkersuinikkut killiffipput eqqartorluaqqissaartariaqaripput.

Tassami pissusissamisuunngilaq utoqqartatta maannakkut aallartinneqartussamik 100 million koruuninik sipaarniarfigineqarnissaannik Naalakkersuisut siunniussaqaqarnerat, siusinaartumik sulisinnaajunnaarnersiuteqartut 40 million koruuninik sipaarniarfigineqarniarnerat, peqqinnissaqarnikkut ilinniartitaanikkullu sipaarniarartoqarnera akuersaarneqarsinnaanngillat.

Akerlianilli inuit perlinngilluaasartut pigissaarnerpaanullu ilaasut aningaasanik illutaarnissannut ukiuni 20-ni ernialersorneqanngitsunik akilersorneqartussaannngitsunillu atukkertarlugit? – uffa pissakinnerpaat inigisaminniit aniatinneqartut.

Umiarsuarnik takornariartaassuarnik piginnittut pisoorsuit 8 million koruuninik tunineqarniarput, suliffeqarfissuit annerusumik ajornartorsiuteqanngitsut akileraarutitigut 90 million koruuninik oqilisaaffiginiarneqarput?

Taamaammat aamma apeqqutit assigiinngitsut siunnersuummut attuumassuteqarsinnaasut eqqarsaatigalugit siunnersuutip ataatsimiititaliami susassaqaqrfiusumi eqqartorluarneqarnissaa Partii Naleqqamniit inassutigaarput.

Taamatullu oqaaseqarluta siunnersuutip aappassaaneraneqannginnerani ataatsimiititaliami suliarineqarnissaa inassutigaarput.